

洛陽名園記序

山東李文叔記洛陽名園凡十有九處自富鄭公而終於呂文穆其聲名氣焰見于功德者遺芳餘烈足以想象其賢其次世位尊崇與夫財力雄盛者亦足以知其人經營生理之勞又其次僧坊以清淨化度羣品而乃斥餘事種植灌溉奪造化之功與王公大姓相軋夫洛陽帝王東西宅爲天下之中土圭日景得陰陽之和嵩少瀍澗鍾山水之秀名公大人爲冠冕之望天匠地孕爲花卉之奇



各園詩序
加以富貴利達優游閒暇之士配造物而相嫵媚
爭妍競巧於鼎新革故之際館榭池臺風俗之習
歲時嬉遊聲詩之播揚圖畫之傳寫古今華夏莫
比觀文叔之記可以知近世之盛又可以信文叔
之言爲不苟且夫識明智審則慮事精而信道篤
隨其所見淺深爲近遠小大之應於興寧變更天
下風靡有所謂必不可者大丞相司馬公爲首後
十五年無一不如公料者至今明驗大効與始言
若合符節文叔方洛陽盛時足跡目力心思之所

及亦遠見高覽知今日之禍曰洛陽可以爲天下
治亂之候又曰公卿高進于朝放乎一已之私意
忘天下之治忽嗚呼可謂知言哉文叔在元祐官
太學丁建中靖國再用邪朋竄爲黨人女適趙相
挺之子亦能詩上趙相救其父云何況人間父子
情識者哀之今記稱潞公年九十而杖履東西按
太師丙午生正紹聖乙亥歲譴逐嶺表立黨之二
年誣謗宣仁聖烈廢降昭慈獻聖羣陰已壯芽孽
弄權宰相不必斥其名後內相王明叟指言紹聖

當國之人如操舟者當左而右當右而左旁觀者爲之寒心與文叔所言放乎一己之私意而忘天下之治忽若相終始愚故曰其言真不苟且也噫繁華盛麗過盡一時至於荆棘銅駝腥羶伊洛雖宮室苑囿滌池皆盡然一廢一興循天地無盡藏安得光明盛大復有如洛陽衆賢佐中興之業乎季父浮休侍郎詠長安廢興地有詩云憶昔開元全盛日漢苑隋宮已黍離覆轍由來皆在說今人還起古人悲感而思治世之難遇嘉賢者之用心

故重言以書其首紹興八年三月望日幽國張琰
德和序



國家圖書館, NATIONAL CENTRAL LIBRARY, TAIWAN, R.O.C.

名
國
言

月

三

陳眉公訂正洛陽名園記

宋 華州 李 薦 記

明 秀水 項燧先 訂

嘉興 沈逢吉 校

富鄭公園

洛陽園池多因隋唐之舊獨富鄭公園最爲近闕而景物最勝游者自其第東出探春亭登四景堂則一園之景勝可顧覽而得南渡通津橋上方流亭望紫筠堂而還右旋花木中有百餘步走蔭榭

亭賞幽臺抵重波軒而止直北走土筠洞自此入
大竹中凡謂之洞者皆斬竹丈許引流穿之而徑
其上橫爲洞一曰土筠縱爲洞三曰水筠曰石筠
曰榭筠歷四洞之北有亭五錯列竹中曰叢玉曰
披風曰滴嵐曰夾竹曰兼山稍南有梅臺又南有
天光臺臺出竹木之杪遵洞之南而東還有臥雲
堂堂與四景堂並南北左右二山背壓通流凡坐
此則一園之勝可擁而有也鄭公自還政事歸第
一切謝賓客燕息此園幾二十年亭臺花木皆出

其目營心匠故逶迤衡直闔爽深密皆曲有奧思
董氏西園

董氏西園亭臺花木不爲行列區處周旋景物歲
增月葺所成自南門入有堂相望者三稍西一堂
在大地間逾小橋有高臺一又西一堂竹環之中
有石芙蓉水自其花間湧出開軒窗四面甚蔽盛
夏燠暑不見畏日清風忽來留而不去幽禽靜鳴
各誇得意此山林之景而洛陽城中遂得之於此
小路抵池池南有堂面高亭堂雖不宏大而屈曲

甚遽游者至此往往相失豈前世所謂迷樓者類也元祐中有留守喜宴集于此

董氏東園

董氏以財雄洛陽元豐中少縣官錢糧盡籍入田宅城中二園因蕪壞不治然其規模尚足稱賞東園北鄉入門有栝可十圍實小如松實而甘香過之有堂可居董氏盛時載歌舞游之醉不可歸則宿此數十日南有敗屋遺址獨流盃寸碧二亭尚完西有大池中爲堂榜之曰含碧水四面噴瀉池中而陰出之故朝夕如飛瀑而池不溢洛人盛醉者走登其堂輒醒故俗曰醒酒池

環溪

環溪王開府宅園甚潔華亭者南臨池池左右翼而北過涼榭復匯爲大池周圍如環故云然也榭南有多景樓以南望則嵩高少室龍門大谷層峯翠巘畢効竒于前榭北有風月臺以北望則隋唐宮闕樓殿千門萬戶巖堯璀璨延亘十餘里凡左太冲十餘年極力而賦者可瞥目而盡也又西有

錦廳繡野臺園中樹松檜花木千株皆品別種列除其中爲島嶋使可張幄次各待其盛而賞之涼榭錦廳其下可坐數百人宏大壯麗洛中無逾者

劉氏園

劉給事園涼堂高卑制度適愜可人意有知木經者見之且云近世建造率務峻立故居者不便而易壞唯此堂正與法合西南有臺一區尤工緻方下許丈地而樓橫堂列廊廡回繚闌楯周接木映花承無不妍穩洛人曰爲劉氏小景今析爲二不

能與他園爭矣

叢春園

今門下侍郎安公買於尹氏岑寂而喬木森然桐梓檜栢皆就行列其大亭有叢春亭高亭有先春亭叢春亭出茶蘼架上北可望洛水蓋洛水自西洶湧奔激而東天津橋者疊石爲之直力瀉其怒而納之于洪下洪下皆大石底與水爭噴薄成霜雪聲聞數十里予嘗窮冬月夜登是亭聽洛水聲久之覺清冽侵人肌骨不可留廼云

天王院花園子

洛中花甚多種而獨名牡丹曰花王凡園皆植牡丹而獨名此曰花園子蓋無他池亭獨有牡丹數十萬本凡城中賴花以生者畢家于此至花時張幙幄列市肆管弦其中城中士女絕烟火游之過花時則復爲丘墟破垣遺竈相望矣今牡丹歲益滋而姚黃魏紫一枝千錢姚黃無賣者

歸仁園

歸仁其坊名也園盡此一坊廣輪皆里餘北有牡丹芍藥千株中有竹百畝南有桃李彌望唐丞相牛僧孺園七里檜其故木也今屬中書李侍郎方舫亭其中河南城方五十餘里中多大園池而此爲冠

苗帥園

節度使苗侯旣貴欲極天下佳處卜居得河南河南園宅又號最佳處得開寶宰相王溥園遂構之園旣古景物皆蒼老復得完力藻飾出之於是有欲憑陵諸園之意矣園故有七葉二樹對峙高

百尺春夏望之如山然今舩堂其北竹萬餘竿皆大滿二三圍疎筠琅玕如碧玉椽今舩亭其南東有水自伊水派來可浮十石舟今舩亭壓其溪有大松七今引水繞之有池宜蓮荇今舩水軒板出水上對軒有橋亭制度甚雄侈然此猶未盡得王丞相故園水東爲直龍圖閣趙氏所得亦大舩第宅園池其間稍北曰郊鄴陌陌列七丞相之第文潞公程丞相宅旁皆有池亭而趙韓王園獨可與諸園列

趙韓王園

趙韓王宅園國初詔將作營治故其經畫制作殆侔禁省韓王以太師歸是第百日而薨子孫皆家京師罕居之故園池亦以扁鑰爲常高亭大榭花木之淵數歲時獨廝養擁篲負畚鍤者於其間而已蓋人之於宴間每自吝惜宜甚於聲名爵位

李氏仁豐園

李衛公有平泉花木記百餘種耳今洛陽良工巧匠批紅判白接以他木與造化爭妙故歲歲益奇

且廣桃李梅杏蓮菊各數十種牡丹芍藥至百餘種而又遠方奇卉如紫蘭茉莉瓊花山茶之儔號爲難植獨植之洛陽輒與其土產無異故洛中園圃花木有至千種者甘露院東李氏園人力甚治而洛中花木無不有中有四并迎翠濯纓觀德超然五亭

松島

松栢樅杉檜栝皆美木洛陽獨愛栝而敬松松島數百年松也其東南隅雙松尤奇在唐爲袁象先

園本朝屬李文定公丞相今爲吳氏園傳三世矣頗葺亭榭池沼植竹木其旁南築臺北構堂東北曰道院又東有池池前後爲亭臨之自東大渠引水注園中清泉細流涓涓無不通處在他郡尚無有而洛陽獨以其松名

東園

文潞公東園本藥圃地薄東城水渺瀰甚廣汎舟游者如在江湖間也淵映瀝水二堂宛宛在水中湘膚藥圃二堂間列水石西去其地餘今潞公

官太師年九十尚時杖屨游之

紫金臺張氏園

自東園並城而北張氏園亦繞水而富竹木有亭四河圖志云黃帝坐玄扈臺郭璞云在洛汭或曰此其處也

水北胡氏園

水北胡氏二園相距十許步在邙山之麓瀍水經其旁因岸穿二土室深百餘尺堅完如埏埴開軒窻其前以臨水上水清淺則鳴漱湍瀑則奔駛皆

可喜也有臺榭花木率在二室之東凡登覽徜徉俯瞰而峭絕天授地設不待人力而巧者洛陽獨有此園耳但其亭臺之名皆不足載載之且亂實如其臺四望盡百餘里而縈伊繚洛乎其間林木蒼蔚烟雲掩映高樓曲榭時隱時見使画工極思不可圖而名之曰玩月臺有庵在松檜藤葛之中關旁牖則臺之所見亦畢陳於前避松檜騫藤葛的然與人目相會而名之曰學古庵其實皆此類

大字寺園

大字寺園唐白樂天園也樂天云吾有第在履道坊五畝之宅十畝之園有水一池有竹千竿是也今張氏得其爲會隱園水竹尚甲洛陽但以其圖致之則某堂有某水某亭有某木其水其木至今猶存而曰堂曰亭者無復彷彿矣豈因於天理者可久而成於人力者不可恃耶寺中樂天石刻存者尚多

獨樂園

司馬溫公在洛陽自號迂叟謂其園曰獨樂園園

卑小不可與他園班其曰讀書堂者數十椽屋澆花亭者益小弄水種竹軒者尤小曰見山臺者高不過尋丈曰釣魚菴曰採藥圃者又特結竹抄落蒼蔓草爲之爾溫公自爲之序諸亭臺詩頗行于世所以爲人欣慕者不在於園耳

湖園

洛人云園圃之勝不能相兼者六務宏大者少幽邃人力勝者少蒼古多水泉者艱眺望兼此六者惟湖園而已予嘗游之信然在唐爲裴晉公宅園

園中有湖湖中有堂曰百花洲名蓋舊堂蓋新也
湖北之大堂曰四并堂名蓋不足勝蓋有餘也其
四達而當東西之蹊者桂堂也截然出於湖之右
者迎暉亭也過橫地披林莽循曲徑而後得者梅
臺知止庵也自竹逕望之超然登之脩然者環翠
亭也眇眇重邃猶擅花卉之盛而前據池亭之勝
者翠樾軒也其大畧如此若夫百花酣而白晝眩
青蘋動而林陰合水靜而跳魚鳴木落而羣峯出
雖四時不同而景物皆好則又其不可殫記者也

呂文穆園

伊洛二水自東南分注河南城中而伊水尤清徹
園亭喜得之若又當其上流則春夏無枯涸之病
呂文穆園在伊水上流木茂而竹盛有亭三一在
池中二在池外橋跨池上相屬也洛陽又有園池
中有一物特可稱者如大隱莊梅楊侍郎園流杯
師子園師子是也梅蓋早梅香甚烈而大說者云
自大庾嶺移其本至此流杯水雖急不旁觸爲異
師子非石也入地數十尺或以地攷之蓋武后天

樞銷鑠不盡者也舍此又有嘉猷會節恭安溪園等皆隋唐官園雖已犁爲良田樹爲桑麻矣然官殿池沼與夫一時會集之盛今遺俗故老猶有識其所在而道其廢興之端者游之亦可以觀萬物之無常覽時之倏來而忽逝也

論曰洛陽處天下之中挾殺滄之阻當秦瀧之襟喉而趙魏之走集蓋四方必爭之地也天下常無事則已有事則洛陽先受兵予故嘗曰洛陽之盛衰者天下治亂之候也方唐貞觀開元之間公卿

貴戚開館列第於東都者號千有餘邸及其亂離繼以五季之酷其池塘竹樹兵車蹂踐廢而爲丘墟高亭大榭烟火焚燎化而爲灰燼與唐共滅而俱亡者無餘處矣予故嘗曰園圃之廢興洛陽盛衰之候也且天下之治亂候於洛陽之盛衰而知洛陽之盛衰候於園圃之廢興而得得則名園記之作予豈徒然哉嗚呼公卿大夫方進於朝放乎以一已之私自爲而忘天下之治忽欲退享此樂得乎唐之末路是矣



國家圖書館, NATIONAL CENTRAL LIBRARY, TAIWAN, R.O.C.

